


鄧季說




21

說

明·陶宗儀纂

郭



1143

北京市中国书店

說郛卷第七十六

青箱雜記

文章純古不害其爲邪文章豔麗亦不害其爲正然或見文章鋪陳仁義道德便謂之正人若言及花草月露便謂之邪人茲亦不盡也皮日休曰予嘗慕宋璟之爲相疑其鐵石爲心腸不解吐婉媚辭及觀其文而有梅花賦清便富豔得南朝徐庾體然予觀近世所謂正人端士者亦皆有豔麗之詞如前世宋璟之比今並錄之

乖崖公張詠席上贈官妓小英歌曰天教搏百花搏作小英明如花住近桃花坊北面門庭掩映如仙家美人宜稱言不得龍腦薰花香入骨維揚軟縠如雲英毫郡輕紗似蟬翼我疑天上婺女星之精偷入筵中名小英又疑王母侍兒初失意謫向人間爲飲妓

不然何得膚如紅玉初碾成眼似秋波雙臉橫舞態因風欲飛去
歌聲遏雲長且清有時歌罷下香砌幾人魂魄遙相驚人看小英
心已足我看小英心未足爲我高歌送一杯我今贈爾新翻曲
韓魏公晚年鎮北都一日病起作點絳唇小詞云病起厭厭宴對
堂前花樹添憔悴亂紅飄砌滴盡胭脂淚惆悵前春誰向花前醉
愁無際武陵回睇人遠波空翠

司馬溫公亦嘗作阮郎歸小詞曰漁舟容易入春山仙家日日閑
綺紗窗院映朱顏相逢醉夢間松露冷海波殷匆匆整棹還落花
寂寂水潺潺重尋此路難

曹修古立朝最號剛方蹇諤嘗見池上有所似者亦作小詩寓意
曰荷葉罩芙蓉圓青映嫩紅佳人南陌上翠蓋立春風

楊湜詞話載溫公西江月詞云寶髻鬆鬆挽就鉛華淡淡妝成輕
烟翠霧罩娉婷飛絮遊絲無定相見爭如不見有情還似無情

歌散後酒初醒深院月明人靜

東臯雜錄云世傳溫公有西江月一詞今復得錦堂春云紅日遲遲虛廊轉影槐陰迤邐西斜彩筆工夫難狀晚景烟霞蝶尙不知春去漫繞幽砌尋花奈狂風過後縱有殘紅飛向誰家始知青春無價嘆飄蓬宦路荏苒年華今日笙歌叢裏特地咨嗟席上青衫溼透箒感舊何止琵琶怎不教人易老多少離愁散在天涯

盧仝集有所思及樓上女兒曲自君之出矣愁夢行等篇皆豔詞也陶淵明亦有閑情賦

苕溪漁隱云予閱宛陵集見一曲其詞乃爲南陽一娼話離別而作然則謹厚者亦復爲之邪其曲云妾家鄧侯國肯愧邯鄲姝世本富繪綺嬌愛比明珠十五學組紉未嘗開戶樞十六失所適姓名傾里閭十七善歌舞使君邀宴娛自茲著樂府不得同羅敷涼溫忽荏苒屢接朝大夫相歡不及情何異逢路衢昨日一見郎目

色曾不渝結愛從此篤慙隔猶云疎如何遂從宦去涉千里塗郎
跨青驄馬妾乘白雲駒送郎郎未遠別妾妾情孤不如水中鱗雙
雙依綠蒲不如雲間鵠兩兩下平湖魚鳥尙有托妾今誰與俱去
去約春華終朝怨日賒一心思杏子便擬見梅花梅花幾時吐頻
搔闌干數東風若見郎重爲歌金縷

侯鯖集又有花娘歌翡翠詞

吹劍錄載范文正守饒喜妓籍一小鬟旣去以詩寄魏介曰慶朔
堂前花自栽便移官去未曾開年年長有別離恨已托春風幹當
來介買送公王衍曰情之所鍾正在我輩以范公而不能免慧遠
曰順境如磁石遇針不覺合而爲一處無情之物尙爾況我終日
在情裏做活計邪張衡作定情賦蔡邕作靜情賦淵明作閑情賦
蓋尤物能移人情蕩則難反故防閑之

獨斷 二卷

蔡邕

字伯喈

漢天子正號曰皇帝自稱曰朕臣民稱之曰陛下其言曰制詔史官記事曰上車馬衣服器械百物曰乘輿所在曰行在所所居曰禁中後曰省中印曰璽所至曰幸進曰御其命令一曰策書二曰制書三曰詔書四曰戒書

皇帝皇王后帝皆君也上古天子庖犧氏神農氏稱皇堯舜稱帝夏殷周稱王秦承周末爲漢驅除自以德兼三皇功過五帝故并以爲號漢高祖受命功德宜之因而不改也

王者至尊四號之別名

王畿內之所稱王有天下故稱王

天王諸夏之所稱天下之所歸往故稱天王

天子夷狄之所稱父天母地故稱天子

天家百官小吏之所稱天子無外以天下爲家故稱天家

天子正號之別名

言字各一
三
皇帝至尊之稱皇者煌也盛德煌煌無所不照帝者諦也能行天道事天審諦故稱皇帝

朕我也古者尊卑共之貴賤不嫌則可同號之義也堯曰朕在位七十載皋陶與帝舜言曰朕言惠可底行屈原曰朕皇考此其義也至秦天子獨以爲稱漢因而不改也

陛下者陛階也所由升堂也天子必有近臣執兵陳于階側以戒不虞謂之陛下者羣臣與天子言不敢指斥天子故呼在階下者而告之因卑達尊之意也上書亦如之及羣臣士庶相與言曰殿下閣下執事之屬皆此類也

上者所謂尊位所在也太史令司馬遷記事當言帝則依違但言上不敢媒瀆言尊號尊王之義也

乘輿出于律律曰敢盜乘輿服御物謂天子所服食者也天子至尊不敢媒瀆言之故託之于乘輿乘猶載也輿猶車也天子以天

下爲家不以京師宮室爲常處則當乘車輿以行天下故羣臣託乘輿以言之或謂之車駕

天子自謂曰行在所猶言今雖在京師行所至耳

禁中者門戶有禁非侍御者不得入故曰禁中

璽者印也印者信也天子璽以玉螭虎紐古者尊卑共之月令曰固封璽

幸者宜幸也世俗謂幸爲僥倖車駕所至臣民被其德澤以僥倖故曰幸也

策書策者簡也禮曰不滿百丈不書于策其制長二尺短者半之其次一長一短兩編下附篆書起年月日稱皇帝曰以命諸侯王三公其諸侯王三公之薨于位者亦以策書誅諡其行而賜之制書帝者制度之命也其文曰制詔三公敕命贖令之屬是也詔書者詔誥也有三品其文曰告某官如故事是爲詔書羣臣有

所奏請尙書令奏之下有制曰天子答之曰可若下某官云云亦曰詔書

戒書戒勅刺史太守及三邊營官被敕文曰有詔敕某官是爲戒敕也世皆名此爲策書失之遠矣

凡羣臣上書于天子者有四名一曰章二曰奏三曰表四曰駁議章者需頭稱稽首上書謝恩陳事詣闕通者也奏者亦需頭其京師官但言稽首下言稽首以聞其中者所請謂若罪法劾案公府送御史臺公卿校尉送謁者臺也表者不需頭上言臣某言下言臣某誠惶誠恐頓首頓首死罪死罪其有疑事公卿校尉百官會議若臺閣有所正處而獨執異意者曰駁議駁議曰某官某甲議以爲如是下言臣愚戇議異其非駁議不言議異其合于上意者文報曰某官某甲議可

漢承秦法羣臣上書皆言昧死言王莽盜位慕古法去昧死曰稽

首光武因而不改朝臣曰稽首頓首非朝臣曰稽首再拜公卿侍中尙書衣帛而朝曰朝臣諸營校尉將大夫以下亦爲朝臣

王者臨撫之別名

天子曰兆民諸侯曰萬民百乘之家曰百姓

天子所都曰京師京水也地下之衆者莫過于水地上之衆者莫過于人京大師衆也故曰京師也

京師天子之畿內千里象日月日月躔次千里

天子命令之別名

命出君下臣名曰命

令奉而行之名曰令

政著之竹帛名曰政

天子父事天母事地兄事日弟事月常以春分朝日于東門之外示有所尊訓人民事君之道也秋夕夕月于西門之外別陰陽之

言字旁 一 一 一
義也天子父事三老者適成于天地人也兄事五更者訓于五品也更者長也更相代至五也能以善道改更己者

三代建正之別名

夏以十月爲正十寸爲尺律中大簇言萬物始簇而生故以爲正也殷以十二月爲正九寸爲尺律中大呂言陰氣太勝助黃鐘宣氣而萬物生故以爲正也周以十一月爲正八寸爲尺律中黃鐘言陽氣踵黃泉而出故以爲正也

三代年歲之別名

唐虞曰載載歲也言一歲莫不覆載故曰載也夏曰歲稔也商曰祀周曰年

閏月者所以補小月之餘日以正歲數故三年一閏五年再閏

天子諸侯后妃夫人之別名

天子之妃曰后后之言後也諸侯之妃曰夫人夫人之言扶也大

夫曰孺人孺之言屬也士曰婦人婦之言服也庶人曰妻妻之言齊也公侯有夫人有世婦有妻有妾皇后赤綬玉璽貴人綢綬金印綢綬色以綠

天子后立六宮之別名

三夫人帝嚳有四妃以象后妃四星其一明者爲正妃三者爲次妃也九嬪夏后氏增以三三而九合十二春秋天子一取十二夏制也二十七世婦殷人又增三九二十七合三十九人八十一御女周人上法帝嚳正妃又九九爲八十一增之合百二十二人也天子一取十二女象十二月三夫人九嬪諸侯一取九女象九州一妻八妾卿大夫一妻二妾士一妻一妾

王者子女封邑之差

帝之女曰公主儀比諸侯帝之姊妹曰長公主儀比諸侯王異姓婦女以恩澤封者曰君比長公主也

天子諸侯宗廟之別名

左宗廟東曰左帝牲牢三月在外牢一月在中牢一月在明牢一月謂近明堂也三月一時以足肥矣徙之三月示其潔也

右社稷西曰右宗廟社稷皆在庫門之內雉門之外天子三昭三穆與太祖之廟七七廟一壇一墀曰考廟王考廟皇考廟顯考廟皆月祭之諸侯二昭二穆與太祖之廟五五廟一壇一墀曰考廟王考廟皇考廟顯考廟皆月祭之

大夫以下廟之別名

大夫一昭一穆與太祖之廟三三廟一壇考廟王考廟四時祭之也士一廟降大夫二也上士二廟一壇考廟王考廟亦四時祭之而已自立二祀曰門曰行下士一廟曰考廟王考無廟而祭之所謂祖稱曰廟者也亦立二祀與上士同府史以下未有爵命號爲庶人及庶人皆無廟四時祭于寢也

周祧文武爲祧四時祭之而已去祧爲壇去壇爲墀有禱焉祭之無禱乃止去墀曰鬼壇謂築土起堂墀謂築土而無屋也

薦考妣于適寢之所祭

春薦韭卵夏薦麥魚秋薦黍豚冬薦稻雁制無常牲取于新物相宜而已

天子之宗社曰泰社天子所爲羣姓立社也天子之社曰王社一曰帝社古者命將行師必于此社授以政尙書曰用命賞于祖不用命戮于社

諸侯爲百姓立社曰國社諸侯之社曰侯社有亡國之社古者天子亦取亡國之社以分諸侯使爲社以自儆戒屋之奄其上使不通天柴其下使不通地自與天地絕也面北向陰示滅亡也大夫以下成羣立社曰置社大夫不得特立社與民族居百姓已上則共立一社今之里社是也

天子社稷土壇方廣五丈諸侯半之

天子社稷皆大牢諸侯社稷皆少牢

天子爲羣姓立七祀之別名

曰司命曰中霤曰國行曰國門曰泰厲曰戶曰竈

諸侯爲國立五祀之別名

曰司命曰中霤曰國行曰國門曰公厲

大夫以下自立三祀之別名

曰族厲曰門曰行

四代臘之別名

夏曰嘉平殷曰清祀周曰大蜡漢曰臘

五帝臘祖之別名

青帝以未臘卯祖赤帝以戌臘午祖白帝以丑臘酉祖黑帝以辰

臘子祖黃帝以辰臘未祖

天子大蜡八神之別名

蜡之爲言索也祭日索此八神而祭之也大同小異爲位相對向
祝曰土反其宅水歸其壑昆蟲毋作豐年若上歲取千百

先嗇 司嗇 農 郵表畷 貓虎 坊 水庸 昆蟲

五祀之別名

法施于民則祀以死勤事則祀以勞定國則祀能禦大災則祀能

扞大患則祀

六號之別名

神號尊其名更爲美稱若曰皇天上帝也鬼號若曰皇祖伯某祇
號若曰后土地祇也牲號牛曰一元大武羊曰柔毛之屬也齊號
黍曰薌合梁曰香萁之屬也幣號玉曰嘉玉幣曰量幣之屬也

凡祭祀宗廟禮牲之別名

牛曰一元大武豕曰剛鬣豚曰肥腍羊曰柔毛雞曰翰音犬曰羹